

Bohmeh Caeuq Gaeq-gyoengq Ndawsuen

父母和院子里的鸡

□ Lingz Sauvaz / 凌少华

“Gu——gu——gu——” Riengzlaeng gij sing heuh baenzrangh, rouh gaeq duz nyaeq duz hung he ciengj gonq lau laeng daj gwnzbya bongh mbin roengzdaeuj heux youq henz ndang bohmeu gou cacoemj dot gwn.

Geij duz mbiengi baihe diuq mbin hwnjdaeuj, daj ndaek rinhung gwnz byai go’ ndoek mbin roengzdaeuj, gij bwn henjgim youq laj ndit ingj ndaej daegbied lwenqda. Nanzgvaiq doengh bouxdaeuz youq aen gunghswu moix bi cungj caeuq ranz gou dingh aeu gaeqiem gvaq ndwencieng. Ngong raen bohmeu gueng gaeq baenzneix haisim, gou mbouj rox mbouj nyinh gag mbon aen soujgih okdaeuj——

Mbanjcukeij, neix dwg aen mbanj Bouxcuengh comzyouq cij miz song bak lai vunz, gij yiengh goengq bya laeng mbanj haemq lumj daengqei, go’ ndoek gwnz bya daengx bi seiqgeiq cungj heufwdfwd, baenzneix aen mbanj neix couh heuhguh Mbanjcukeij. Aen ranzlaeuz gou couh guh youq cungqgyang ndawmbanj, aen ranzgaeq guh youq laj goek dinbya henz suenbyaek. Ranz gou moix bi cungj ciengx miz bak lai duz gaeqdoj, bohmeu haeujsim dajciengx, gaeuq ngoenznaengz caeuq gvaq ciet ndawranz gaj gwn, caemhcai q daengz ndwencieng lij ndaej gai geijcib duz gaeqiem ne.

Baenzngoengz daxboh daxmeu couh gueng di haeuxgok, haeuxyangz, gij byaekheu ndaw suen, gij haeux lw byaek lw…… Moix ngoenz lij langh duzgaeq hwnj gwnzbya bae gag ra gwn dem, gij nohgaeq ranz gou haengjdingh ndeigwn bw. Daxboh lij naeuz langh duzgaeq dwk gwnzbya bae lij ndaej coengh vunzraeuz cawz “seiqhah” ne!

Mbouj lwnh mwngz mbouj rox, doengh gij gaeqdoj ranz gou cungj dwg duz gaeqmeh gag faeg gyaeq byoeng okdaeuj bw, cibgeij duz gaeqmeh bomz youq gizde. Daxmeu cungj anbaiz ndaej ndei, mboujguenj seiznit seizndat, rouh nem rouh byoeng okdaeuj, hawj duz de doxdam roengzbae, mwngz yawj: Gaeqhung, gaeqlwg, gaeqgeq, gaeqoiq, gaeqboux, gaeqmeh, gaeqiem, gaeqhangh, cijaeu mwngz gyaez,

siengj gwn maz feihdauh, daj song gaen buenq daengz haj gaen buenq ndawde, mwngz vix daengz duz lawz, daxboh gou itdingh iet fwngz couh dawz ndaej hawj mwngz. Couh baengh gij gingniemh ciengx gaeq daxboh gou, ciengx gij gaeqiem haenx coengzlaiz mbouj miz mauhgyaq roek gaen naek, gwn lai di hix mbouj roxnyinh nywnx. Daxboh angq naeuz, huq ndei mbouj caih lai, ciengx miz bak lai duz couh ndaej lo, doenghgij gyaeqgaeq faeg mbouj liux dawz daeuj cawj dang roxnaeuz cien gwn youh dwg lingh cungj feihdauh!

“Bouxlaux dwg aen bauj ndawranz”, caen gangj ndaej deng! Yienznaeuz daxboh daxmeu gou gaeng ndaej betcib bi doxbae lo, ndangdae lij cangqewtwt. Daxboh ciengz naeuz: “Lwglan gaeng majhung liux, hix cungj miz hong guh lo, dou song bouxlaux ngoenznaengz gag youq ndawranz hix mbwq lai, dwkbaiz, dwkgeiz, dingq fwen, ngongz densi mbwq le, gizneix gizde guh saekdi hongfwngz, ietiet hwet, ngauzngauz ndang, dauq roxnyinh ndangdae engq soengswt.” Daxmeu hix gangj gij “ging ciengx ndang” de: Guhhong couhdwg cungj lienhdang ndeu! Seizneix ndaw suen gaeng ciep ndaej swlaizsuij haeujbae lo, dou song bouxlaux ndaem saekdi byaek ndaej, sou bouxcoz couh guenj sim’ onj guh hong bonjfaenh couh ndaej lo!” Couh yienghneix, daxboh daxmeu ngoenznaengz cungj dwg nyaengq bae nyaengq dauq, cungj mbouj nyienh hoengq youq saekdi, dajleix gij byaek ndaw suen it bi seiqgeiq cungj miz gij byaek gwn mbouj liux, gosong, gohing, mbaw lwgmaenz, byaekmbaengq daengj engq dwg baenz coij baenz coij heufwdfwd, gij gingjsaek yienghneix ngongzngong ndawsim cungj gag angqvauvau.

Gou gag roxnyinh gou caen dwg doekseng youq diegndei, caemhcai miz daxboh daxmeu song bouxlaux neix ciuqgoq nyaenx lai ganqhoh nyaenx lai! Neix couhdwg bohmeu gou, geijlai gaenxguh, geijlai dwggingq! Daxboh daxmeu, nyienh sou song bouxlaux naih gyaen naih souh, ndangdae cangqmaengh!

·gojgaeq iq·

Daen Swhgeij

咒自己

□ Liengz Couhli / 梁洲利

Ndaw mbanj gou miz yahgeq he, heuhguh Yahmbej. Yah neix bingzseiz gangj vah dangq okroet nei, mbouj gvaq ukgyaeuj couh bongh okdaeuj.

Miz ngoenz he, de bae doengh mbwn laep cij dauqranz, de dwk gaeq haeuj roengq bae seiz, ra duz gaeqbou he mbouj raen, de couh ok doulaeng bae, daen ndaq naeuz: “Haemhneix bouxlawz aeu duz gaeq gou bae, cien ranz baenz hozfoeg, hozbop, hoznaeuh liux bae, ciuhneix cungj mbouj ndei gvaq ciuh……” Gij maz vahdoeg de cungj ndaq liux ndaq caenh.

Ngoenz daihngieh haetromh, Yahmbej bae ndawsuen mbaet byaek, raen duz gaeqbou de dai youq ndaw cingjraemx. De baez yawjraen, doeksat yat, de riuj duz gaeq de hwnjdaeuj, gag gangjnyumnyum naeuz: “Duzgaeq baenzneix hung lij doek cingj dai, caen geizheih bw.”

Goeng ranz gwnz de ndaejnyi le, couh byaij gvaqdaeuj, riunyubnyub naeuz: “Gij vah haemhlwenz mwngz daen ndaq vunz haenx, deng sou boh, meh, lwg geij boux gak rap lo.”

Yahmbej dingq le, naj raezrangrang, ngoemqngwtngwt byaij haeuj ndawranz bae lo.



97. Dungx de nduen dangqmaz,
Mbouj ga cix mbouj gyauej,
Gwn heiq mbouj gwn haeux,
Baez moeb couh diuq sang.
(Aengiuz)

98. Miz song daeg nuengx iq,
Mbouj biz hix mbouj sang,
Danghnaeuz vunz gwn can,
De sien ganj cimz feih.
(Dawh)

99. Aen goeng naj ndaemndat,
Youq bangxdat san saeng.
(Duzgyau)

100. Aen goeng naj ndaemndat,
Mbat hat couh daemx mbwn.
(Nyngz cungq)

101. Song duz bit heuhmbatmbat,
Daengz lajdat couh ninz.
(Daenj haiz byaij)

Vah Duenz

谜语

□ Soucomz Cingileix Veiz Daz

102. Duz maz youq gyang ranz,
Caij rieng yiengj daekgvangh.
(Daem doiq)

103. Boux vunz ndeu sangsang,
Buh leg mbouj rox fong.
(Gogyoij)

104. Naed duh gaeuq daengx ranz,
Aen suenq gaeuq daengx mbanj.
(Aendaeng)

105. Duz maz mbouj miz bwn,
Youq gyangmbwn hoijrok,
Duz maz mbouj miz ndok,
Youq baksok haeb vunz.
(Duzgyau roxnaeuz duzbing)

106. Duz lawz ndoj ndaw haz,
Miz da ndi rox yaep,
Duz lawz youq ndaw laep,
Miz daep mbouj miz daw.
(Duzdaek roxnaeuz duznou)

107. Duz lawz roeg gwn bya,
Gamz daek ma gueng meh?
Duz lawz hemqmbembe,
Din givh meh gwn cij?
(Roegga caeuq duzyiengz)
(14)

